



Uunga siunnersuut: Inatsisartut inatsisaat siusinaartumik pensionisiaqartitsisarneq pillugu Inatsisartut inatsisaata allanngortinneqarnera pillugu.

(Isumaginninnermut, Suliffeqarnermut Nunamullu Namminermt Naalakkersuisoq)
(Siullermeerneqarnera)

Soorluaasit mattusersuinerinnartut isikkoqarpasittoq, Naalakkersuisut siunnersuummik saqqummeeqqinnerat, utoqqaat pillugit aqqissuusseqqiinnissamut sunniuteqartussamik. Naalakkersuisut sulii utoqqaat pillugit periusissiaq sivisuumik utaqqineqartoq sulii saqqummiutinngilaat, maannakkullu aamma siunnersuut suliarinialerparput, siusinaartumik pensionisiaqartut ukiumut isertitaannik allannguingaartussaangitsoq. Pingaartumik maannakkut aningaasat naleerukkiartornerannut sanilliutissagaanni.

Taakku saniatigut sulii ima isumaqarpugut, utoqqaat pillugit aqqissuusseqqiinissaq takorluukkatsinnut naapertuutinngilluinnartoq, taamatuttaarlu siunnersuutit siusinnerusukkut saqqummiunneqartut eqqarsaatigilluagaarpasinnatillu tukappasimmata. Naalakkersuisut siunnersuummik uuminnga saqqummiussinerat uagut naliliinerput malillugu siusinnerusukkullu utoqqaat pillugit aqqissuusseqqiinissap, naatsorsuutit tamarmik pissarsiarineqareernissaannut aammalu partiit tamarmik ataatsimoorlutik utoqqaat pillugit aqqissuusseqqiineq annertoq pisariaqartorlu malunnaatilimmik pisariaqarluinnartumillu pitsanngorsaataasussamik utaqqisikkallarneqarnissaanik kaammattuteqarsimanerput uppernarsarpaa. Naalakkersuisummi saqqummiinerminni allapput:

“Kaajallaasitali maanna atuuttuusup isumaginninnikkut aningaasanngorlugit akilerneqartartut pillugit nutarterlugu malinnaatinneqarneranut atatillugu paasineqarpoq naatsorsuinerpigut pissusissamisuunngitsoqartoq.” Oqaaseq maluginiarsiuk: “paasineqarpoq”. Taamaattumik paasisariaqarparput, politikikkut mattusersuilluni sulineq allaffissornerup annertusineranik kinguneqaannarsimasoq, aamma siunissami, qularutissaanngitsumik naleqqussaarneqarnissaa ilimanarluinnarluni; pingaartumik utoqqarnut periusissiaq nutaaq saqqummerpat.

Demokraatit upernaanerani utoqqalinersiutit- aamma siusinaartumik pensionit allanngortinneqarnissaannik siunnersuutitut akuserseqataannngillat, nalilersoratsigu partiit qineqqusaarutaannut naapertuutinngilluinnartut. Naalakkersuisut naalakkersuisooqatigiillu oqaraluarput, utoqqalinersiutit qaffannerat aallartinnerinnaasoq. Qaffaassutimininnguarli utoqqarnut sunnguamilluunniit malunnaateqanngilaq. Aningaasatigut imaluunniit peqqissusaannut. Aningaasat nalikillinerat qaffaaniminnguarlu, utoqqaat ilaannut toqqissisimannnginnerulernermik pilersitsiinnarpoq. Qanoq ilillutik nerisassarsissappat, ineqarnermut tapiissut apparpat aammalu qaammammut 1 koruuniinnarmik pisartagaqarnerulerpata aammalu inuussutissat akimikkut qaffakkaluttuinnarpata?



Naalakkersuisut ineqarnermut tapiissutitut aqqissuusseqqiinissamut piareersimasuuteqanngillat, taassumalu kinguneraa aningaasat karsimit karsimut allamut nuunneqaannarnerat, utoqqalinersiuteqartullu siusinaartumillu pensionisiallit piitsuunerulersiinnarlugit. Taamaammat eqqarsarluaqqaartariaqarpugut siunnersuutip uuma isornartorsiutitaqanngitsumik akuersissutigineqannginnerani.

Siusinaartumik pensionisialinnit 21-ni, uani siunnersuummi pineqartuni qassit sulisinnaappat? Ilumut siunnersuut pimoorunneqarpa aammalu siunnersuut naapertuuppa? Apeqqutigerusuppara qanoq annertutigisumik uuma siunnersuutip pisariillisaallunilu allaffissornermillu annikillisaataassanersoq, tamannami siusinaartumik pensionilinnut tamanut pisariaqartumik naleqarnerulersitsisussaammat.

Siusinaartumik pensionisialinnut 21-nut siunnersuummi uani pineqartunut, kingunerisussaammagu, akileraarutip ilanngaatinginnginnerani qaammammut 833,33 koruuninik tigusartagaqarnerulernissaat siusinaartumik pensionisiaannut ilanngaataanngitsumik. Ilumut malunnaatilimmik ulluinnarni atugaannut pitsanngorsaataava, akit qaffakkaluttuinnarneri eqqarsaatigigaanni?

Demokraatinut isumalluarnarlunnarpoq, sulerusussuseqalernissaq pilerinarnerulersinneqassammat. Taamaaqqunaqaarlu nunatsinni inunnut TAMANUT. Tassanili siunnersuutigineqarpoq, innuttaasut 21-it ukiumut 10.000 koruuninik akissarsinerusinnaasut siusinaartumik pensionisiaminnik ilanngaaffigineqaratik. Sooq 10.000 koruunit? Soormi killeqanngitsumik atuuttunngortikkaanni? Suliffeqarfiit assigiingitsut tamarmik ilungersoqalutik sulisussanik amigaaateqarput, siuariartornerup annertusiartorneranut atugarissaarnissamullu tunniusseqataanissamut suleqataasinnaasunik. Taamaattumik pissusissamisoortariaqarpoq inunnut, killilimmik sulisinnaassuseqaraluarlutik allatuulli kiffaanngissuseqarlutik inuttullu naleqartillutik sulinissaannut killileersuutit peerluinnarnissaat, sapinngisaminnillu suleqataanertik pillaatisiarinagu.

Aqqissuusseqqiinernik taaneqartunik sanasarnerput unitsilluinnartariaqarparput, Namminersorlutik Oqartussani suleriutsinik allannguinnartussanik sunnguamilluunnit inuiaqatigiinnut pisariaqartunik allannguuteqartitsinatillu naleqarnerulersitsinngitsunik. Inuit salloqittaarineqarsinnaanngillat aqqissuusseqqiinerusoq, karsimiit karsimut nuussiinnarnikkut. Taakkuninnga allannguinerit teknikkikkut allannguinerut taaneqarsinnaasut innuttaasunut paatsiveerussaataapput iluaqutaanerminninngarnik, Naalakkersuisullu tunngavilersorluarnerusariaqarpaat, sooq isumaqarnerlutik, isumassarsiatsialaasoq siusinaartumik pensionisialinnut inatsisip allanngortinnissaa maannakkutut isikkoqartillugu. Isumaqarpugut politikkikkut akisussaassuseqannginnerusoq innuttaasut neriullualernerinnarmik imaqartumik aaliangiinermik, naliliisinnaanerput malillugu allaffissornerinnakkut aqqissuusseqqiinerorpasimmat, aqqissuusseqqiinerunani innuttaasut ulluinnarni inuunerminni malugisinnaasaanut.

Ataatsimiititaliamut attuumassuteqartumut innersuussutigaarput siunnersuutip teknikkikkut allannguutissaasa qulaajarnissaat aammalu nalunaarusiornissaq ersarissaanissarlu, qanoq uuma siunnersuutip siusinaartumik pensionisiallit pigissaarnerulersissinnaanera.